

whakatakoto ki te aroaro o te Minita Māori, o Te Hōnore Koro Wētere. Ko te tuatahi o aua mōtini he tono atu "kia whakatakototia he ture e hāngai ana, kia taea ai te tikanga o te kupu 'official', mō te āhua ki te reo Māori, te whakawhānui kia āhei ai te tangata ki te korero i tēnei reo ahakoa ki a wai, ahakoa ki hea, kia rite ai ki te kōrerotia o te reo Pākēhā". Ko te tuarua e pā noa iho ana ki te ture; ko te tono atu a te rūnanga kia whakawhānuitia ake te mana o te reo Māori i roto i ngā kōti o tēnei whenua. Ko ētahi atu o ngā mōtini he awhero kia aro nuitia mai Te Taura Whiri hei kaitohutohu i ngā kura, i ngā kaipāho, i te iwi whānui hoki mō ngā āhuatanga katoa e pā ana ki te reo Māori, kia taea ai ngā kaupapa a tēnā rōpū, a tēnā rōpū te whakawhāiti mai ki te wāhi kotahi.

Hei whakatepe noa i ēnei kōrero ko tā mātou takarure i ngā mihi ā mātou ake ki a koutou i haere mai nei i wīwī, i wāwā ki te kawē mai i ō koutou whakaaro ki tō tātou māpihi maurea.

TE HUI A TE HUNGA TĀ PUKAPUKA REO MĀORI

I te marama kua pahure i tū ki tō mātou tari te hui a te hunga ko tā rātou mahi he tā pukapuka ki te reo Māori. I whakaōpetitia mai ki Te Whanga-nui-a-Tara nei whiriwhiri tahi ai i ngā āhuatanga katoa e pā ana ki te hapa o te reo Māori o roto i ngā pukapuka hei pānui mā te taitamariki me te taipakeke. Ahakoa tō mātou koa kei te nui haere ake ngā pukapuka kua tāia ki te reo Māori, ahakoa tonu tērā, kei te mānakanaka, mānatunatu mātou ki te kino o te reo o ētahi o aua pukapuka. He aha te hua o ngā pukapuka Māori mehemea ko te reo o roto kei te hē?